



ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ
ՄՐՑԱԿՑՈՒԹՅԱՆ ՊԱՇՏՊԱՆՈՒԹՅԱՆ ՀԱՆՁՆԱԺՈՂՈՎԻ
ԳԼԽԱՎՈՐ ՔԱՐՏՈՒՂԱՐ

Հայաստանի Հանրապետություն, 0010, ք. Երևան, Տիգրան Մեծի 4, հեռ.՝ (+374 60) 830 840, (+374 60) 830 850

Էլ-փոստ՝ info@competition.am, վեբ կայք՝ <http://www.competition.am>

«22» 12 2022թ.

No 008352

«ՆԱՏՈՒՌԱԼ ՖՈՒԴՍ» ՍԱՀՄԱՆԱՓԱԿ
ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ ՏՆՕՐԵՆ
ՊԱՐՈՆ ԱՐՏՈՒՇ ԳԱԼՍՏՅԱՆԻՆ
(հասցե՝ ք. Երևան, Արաբկիր, Հակոբ Հակոբյան, 10/57)

Հարգելի՛ պարոն Գալստյան,

Մրցակցության պաշտպանության հանձնաժողովը (այսուհետ՝ **Հանձնաժողով**) 2022 թվականի դեկտեմբերի 20-ի «Նատուռալ Ֆուդս» սահմանափակ պատասխանատվությամբ ընկերության կողմից տնտեսական մրցակցության բնագավառում իրավախախտման վերաբերյալ վարույթ հարուցելու մասին» թիվ 471-Ա որոշմամբ (այսուհետ՝ **թիվ 471-Ա որոշում**) հարուցել է թիվ ՀԳ-03620/22 վարույթը:

«Նատուռալ Ֆուդս» սահմանափակ պատասխանատվությամբ ընկերության (այսուհետ՝ **Ընկերություն**) լսված լինելու իրավունքն իրացնելու նպատակով Ընկերությունը կարող է երկշաբաթյա ժամկետում Հանձնաժողով ներկայացնել գրավոր դիրքորոշում և այն հիմնավորող նյութեր հարուցված վարույթում քննարկվող հարցերի վերաբերյալ: Ընկերության հիմնավոր միջնորդության հիման վրա երկշաբաթյա ժամկետը Հանձնաժողովի նախագահի գրությամբ կարող է երկարաձգվել մինչև երկշաբաթյա ժամկետով:

Տեղեկացնում ենք նաև, որ

1. «Նորմատիվ իրավական ակտերի մասին» օրենքի 31-րդ հոդվածի 2-րդ մասի համաձայն՝ տարիներով, ամիսներով կամ օրերով հաշվարկվող ժամկետների ընթացքն սկսվում է այն օրացուցային տարվա, ամսվա, ամսաթվի կամ վրա հասած իրադարձությանը հաջորդ օրվանից, որով որոշված է դրա ժամկետի սկիզբը:

2. Ընկերությունը թիվ 471-Ա որոշումն ստանալու օրվանից երկշաբաթյա ժամկետում Ընկերությանը վերագրվող իրավախախտման փաստն ընդունելու և իրավախախտման հետևանքները վերացրած լինելու դեպքում կարող է արագացված վարույթ կիրառելու մասին միջնորդություն ներկայացնել Հանձնաժողով, ընդ որում, արագացված վարույթի կիրառման արդյունքում պատասխանատվության միջոց կիրառելիս պատասխանատվության միջոցը չի կարող գերազանցել տվյալ իրավախախտման համար նախատեսված ամենախիստ պատասխանատվության միջոցի մեկ երկրորդը:

3. «Տնտեսական մրցակցության պաշտպանության մասին» օրենքի 94-րդ հոդվածի 1-ին մասի համաձայն՝ պատասխանատվության միջոց կիրառելիս Հանձնաժողովը հաշվի է

առնում տվյալ իրավախախտման բնույթը, տևողությունը, իրավախախտման հնարավոր կամ փաստացի ազդեցությունը շուկայում մրցակցային իրավիճակի կամ սպառողների շահերի վրա, տնտեսավարող սուբյեկտի կողմից տվյալ խախտման կրկնակիությունը, եթե նախորդ խախտման համար պատասխանատվության միջոց կիրառելու օրվանից չի անցել հինգ տարի, տնտեսավարող սուբյեկտի դիտավորության աստիճանը, տնտեսավարող սուբյեկտի կողմից իրավախախտում կատարվելու շարժառիթները և հանգամանքները, տնտեսավարող սուբյեկտի կողմից իրավախախտում կատարվելու փաստն ընդունելու կամ Հանձնաժողովի հետ համագործակցելու հանգամանքը, պատասխանատվությունից ազատելու հիմքերը, տնտեսավարող սուբյեկտի վրա նշանակվող տուգանքի հնարավոր ազդեցությունը, տվյալ տնտեսավարող սուբյեկտի գործունեության ոլորտը և տնտեսավարող սուբյեկտի պատմությունը: Ընդ որում, «Վարչարարության հիմունքների և վարչական վարույթի մասին» օրենքի 43-րդ հոդվածի համաձայն՝ Ընկերության համար բարենպաստ հանգամանքների ապացուցման բեռը կրում է Ընկերությունը:

4. Պատասխանատվության միջոցի ընտրությունը և տուգանքի հաշվարկումն իրականացվում է Հանձնաժողովի 2021 թվականի դեկտեմբերի 28-ի թիվ 395-Ն որոշմամբ սահմանված մեթոդաբանությամբ:

5. ՀՀ քրեական օրենսգրքի 479-րդ հոդվածով վարչական վարույթով ապացույց կամ բացատրություն կեղծելու, փոխելու, ոչնչացնելու կամ թաքցնելու կամ կեղծ ապացույց ներկայացնելու համար սահմանված է քրեական պատասխանատվություն:

6. ՀՀ քրեական օրենսգրքի 504-րդ հոդվածով վարչական վարույթով սուտ բացատրություն կամ սուտ ցուցմունք տալու համար սահմանված է քրեական պատասխանատվություն:

7. Ընկերության կողմից թիվ ՀԳ-03620/22 վարույթի հարուցումից հետո դրա շրջանակում քննարկվող վարքագծի կրկնությունը հիմք է նոր վարույթ հարուցելու համար:

8. Հանձնաժողով փաստաթղթեր ներկայացնել և ստանալ, ինչպես նաև Հանձնաժողովի հետ հետագա ողջ հաղորդակցությունը կարող եք իրականացնել նաև առցանց՝ Հանձնաժողովի e-Compete էլեկտրոնային համակարգի (այսուհետ՝ **Համակարգ**) միջոցով, որի համար անհրաժեշտ է գրանցվել Համակարգում՝ մուտք գործելով Հանձնաժողովի պաշտոնական կայքի (www.competition.am) «Իմ էջը» բաժին, ընտրելով «Գրանցվել» հրամանը և լրացնելով անձի նույնականացման համար պահանջվող տվյալները:

Կից ներկայացվում է թիվ 471-Ա որոշման պատճենը:

Առդիր՝ «3» թերթ:

ՀԱՐԳԱՆՔՈՎ՝



ԱՇՈՏ ՎԱՀԱՆՅԱՆ

Կապարող՝ Քրիստինե Սարգսյան

Անբարեխիղճ մրցակցության վերահսկողության վարչություն

Հեռ. (+374 60) 830-840 (244)



ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ
ՄՐՑԱԿՑՈՒԹՅԱՆ ՊԱՇՏՊԱՆՈՒԹՅԱՆ ՀԱՆՁՆԱԺՈՂՈՎ
Ո Ր Ո Շ ՈՒ Մ

20 դեկտեմբերի 2022 թվականի թիվ 471-Ա

**«ՆԱՏՈՒՌԱԼ ՖՈՒԴԱ» ՍԱՀՄԱՆԱՓԱԿ ՊԱՏԱՍԽԱՆԱՏՎՈՒԹՅԱՄԲ
ԸՆԿԵՐՈՒԹՅԱՆ ԿՈՂՄԻՑ ՏՆՏԵՍԱԿԱՆ ՄՐՑԱԿՑՈՒԹՅԱՆ ԲՆԱԳԱՎԱՌՈՒՄ
ԻՐԱՎԱՆԱԽՏՄԱՆ ՎԵՐԱԲԵՐՅԱԼ ՎԱՐՈՒՅԹ ՀԱՐՈՒՑԵԼՈՒ ՄԱՍԻՆ**

Մրցակցության պաշտպանության հանձնաժողովը (այսուհետ նաև՝ **Հանձնաժողով**) 2022 թվականի դեկտեմբերի 20-ի նիստում, քննարկելով «Նատուռալ Ֆուդս» սահմանափակ պատասխանատվությամբ ընկերության (այսուհետ նաև՝ **Ընկերություն**) կողմից տնտեսական մրցակցության բնագավառում իրավախախտման վերաբերյալ վարույթ հարուցելու մասին հարցը,

Պ Ա Ր Զ Ե Ց

Հանձնաժողովի 2022 թվականի սեպտեմբերի 28-ի «Նատուռալ Ֆուդս» սահմանափակ պատասխանատվությամբ ընկերության նկատմամբ պատասխանատվության միջոց կիրառելու մասին» թիվ 349-Ա որոշմամբ (այսուհետ նաև՝ **թիվ 349-Ա որոշում**) Ընկերությանը հանձնարարվել է 10 (տասը) աշխատանքային օրվա ընթացքում շտկել Օրենքի խախտումը՝ դադարեցնել բոլոր եղանակներով «ԳՐՏՆԱԿ» բառը պարունակող ապրանքային նշանի օգտագործումը:

Թիվ 349-Ա որոշումը 2022 թվականի հոկտեմբերի 3-ին և 2022 թվականի հոկտեմբերի 24-ին ուղարկվել է Ընկերության համապատասխանաբար իրավաբանական և գործունեության հասցեներով, որը ետ է վերադարձվել համապատասխանաբար «Չպահանջված» և «Անհայտ» նշումներով:

Թիվ 349-Ա որոշումը <http://www.azdarar.am> կայքում հրապարակվել է 2022 թվականի նոյեմբերի 9-ին, և այն ուժի մեջ է մտել 2022 թվականի նոյեմբերի 15-ին, հետևաբար Ընկերությունը հանձնարարությունը պետք է կատարեր մինչև 2022 թվականի նոյեմբերի 29-ը ներառյալ:

Ընկերությունը 2022 թվականի դեկտեմբերի 7-ին Հանձնաժողով է ներկայացրել գրություն, որով հայտնել է, որ ապրանքային նշանի օգտագործումը դադարեցված է՝

կից ներկայացնելով առևտրի օբյեկտի լուսանկարները (առևտրի օբյեկտի դիմային հատվածի և ներսի պատի լուսանկարներ):

«Գրտնակ» սահմանափակ պատասխանատվությամբ ընկերության և Միքայել Գյուլասարյանի ներկայացուցիչը 2022 թվականի դեկտեմբերի 12-ին Հանձնաժողով է ներկայացրել դիմում (այսուհետ նաև՝ **Դիմում**), որով հայտնել է, որ Ընկերությունը շարունակում է ապրանքային նշանի օգտագործումը ինչպես ք. Երևան, Աճառյան 82 հասցեում գործող առևտրի օբյեկտում, այնպես էլ «Գրտնակ Թոնրատուն» ֆեյսբուքյան էջի միջոցով՝ կցելով լուսանկարներ:

Հանձնաժողովի նախագահի 2022 թվականի դեկտեմբերի 15-ի «Արտաքին դիտում իրականացնելու մասին» թիվ 275-Ա հրամանի հիման «Գրտնակ Թոնրատուն» անվանումով ֆեյսբուքյան էջում և ք. Երևան, Երևան-Սևան մայրուղուն հարող բաց տարածքում իրականացվել է արտաքին դիտում (այսուհետ նաև՝ **Արտաքին դիտում**), որոնց արդյունքներով 2022 թվականի դեկտեմբերի 15-ին կազմվել են «Արտաքին դիտման արդյունքների վերաբերյալ» թիվ 275 և թիվ 275/1 արձանագրությունները (այսուհետ նաև՝ **թիվ 275 և թիվ 275/1 արձանագրություններ**):

Թիվ 275 և թիվ 275/1 արձանագրությունների համաձայն՝ «Գրտնակ Թոնրատուն» անվանումով ֆեյսբուքյան էջում և ք. Երևան, Երևան-Սևան մայրուղուն հարող բաց տարածքում գործող առևտրի օբյեկտում օգտագործվում է «ԳՐՏՆԱԿ Թոնրատուն» բառը պարունակող ապրանքային նշանը:

«Գրտնակ» սահմանափակ պատասխանատվությամբ ընկերության և Միքայել Գյուլասարյանի ներկայացուցիչը 2022 թվականի դեկտեմբերի 16-ին Հանձնաժողով է ներկայացրել Դիմումին նույնաբովանդակ հաղորդում (այսուհետ նաև՝ **Հաղորդում**):

Օրենքի 37-րդ հոդվածի 1-ին մասի 3-րդ կետի համաձայն՝ Հանձնաժողովը հարուցում է տնտեսական մրցակցության բնագավառում իրավախախտման վերաբերյալ վարույթ և սույն օրենքը խախտելու համար տնտեսավարող սուբյեկտներին, պետական մարմիններին և նրանց պաշտոնատար անձանց ենթարկում է պատասխանատվության՝ հանձնարարելով իր սահմանած ժամկետում շտկել խախտումը և հետագայում բացառել այն:

Օրենքի 99-րդ հոդվածի 1-ին կետի համաձայն՝ Հանձնաժողովի որոշումները, դրանցում սահմանված պայմանները, պարտավորությունները և տրված հանձնարարությունները պարտադիր են դրանց հասցեատերերի համար և ենթակա են կատարման Հայաստանի Հանրապետության ամբողջ տարածքում:

Օրենքի 101-րդ հոդվածի 1-ին մասի համաձայն՝ Հանձնաժողովի որոշմամբ սահմանված պայմանները, նախատեսված պարտավորությունները և տրված հանձնարարությունները որոշումն ուժի մեջ մտնելու օրվանից ենթակա են անհապաղ, սակայն ոչ ուշ, քան որոշման մեջ սահմանված ժամկետում կատարման, և որոշման բողոքարկումը չի կասեցնում որոշման գործողությունը կամ կատարումը:

Օրենքի վկայակոչված իրավադրույթների բովանդակային վերլուծությունից հետևում է, որ Հանձնաժողովն իրավունք ունի տնտեսավարող սուբյեկտին հանձնարարել շտկելու Օրենքի խախտումը՝ սահմանելով հանձնարարության կատարման ժամկետ, իսկ տնտեսավարող սուբյեկտը պարտավոր է կատարել Հանձնաժողովի հանձնարարությունը՝ դրանում նշված ժամկետում:

Տվյալ պարագայում թիվ 349-Ա որոշումը հրապարակվել է <http://www.azdarar.am> կայքում 2022 թվականի նոյեմբերի 9-ին, և այն ուժի մեջ է մտել 2022 թվականի նոյեմբերի 15-ին: Հետևաբար, Ընկերությունը թիվ 349-Ա որոշմամբ ամրագրված խախտումները պարտավոր էր շտկել տասը աշխատանքային օրվա ընթացքում՝ մինչև 2022 թվականի նոյեմբերի 29-ը ներառյալ: Մինչդեռ, Դիմումի, Հաղորդման և թիվ 275 և թիվ 275/1 արձանագրությունների համաձայն՝ Ընկերությունը շարունակում է ապրանքային նշանի օգտագործումը ինչպես ք. Երևան, Աճառյան 82 հասցեում գործող առևտրի օբյեկտում, այնպես էլ «Գրտնակ Թոնրատուն» ֆեյսբուքյան էջի միջոցով:

Նման պայմաններում Ընկերության վարքագիծն առերևույթ կարող է պարունակել թիվ 349-Ա որոշմամբ տրված հանձնարարության չկատարման հատկանիշներ:

Օրենքի 92-րդ հոդվածի համաձայն՝ տնտեսական մրցակցության բնագավառում իրավախախտման համար Հանձնաժողովն իրավասու է տնտեսավարող սուբյեկտներին, պետական մարմիններին և դրանց պաշտոնատար անձանց տալու նախազգուշացում կամ նշանակելու տուգանք:

Օրենքի 93-րդ հոդվածի 12-րդ մասի համաձայն՝ տնտեսավարող սուբյեկտի կողմից Հանձնաժողովի որոշմամբ ամրագրված խախտումները սահմանված ժամկետում չդադարեցվելու կամ չշտկվելու կամ որոշմամբ նախատեսված պայմանները, պարտավորությունները կամ հանձնարարությունները սահմանված ժամկետում չկատարվելու համար նշանակվող տուգանքի չափը կազմում է մինչև հինգ միլիոն դրամ:

Հաշվի առնելով վերոգրյալը՝ Հանձնաժողովն անհրաժեշտ է համարում Ընկերության կողմից տնտեսական մրցակցության բնագավառում իրավախախտման հատկանիշների առկայությունը պարզելու նպատակով հարուցել վարույթ:

Հիմք ընդունելով վերոգրյալը և ղեկավարվելով Օրենքի 76-րդ հոդվածի 1-ին մասի 1-ին կետով, 79-րդ հոդվածի 3-րդ մասի 1-ին կետով, 83-րդ հոդվածի 1-ին մասով, 42-րդ հոդվածի 2-րդ մասով՝ Հանձնաժողովը


Ո Ր Ո Շ Ե Ց

1. «Նատուռալ Ֆուդս» սահմանափակ պատասխանատվությամբ ընկերության կողմից տնտեսական մրցակցության բնագավառում իրավախախտման վերաբերյալ հարուցել վարույթ:

2. Սույն որոշումն ուժի մեջ է մտնում ընդունման պահից:

ՆԱԽԱԳԱՀ

2022 թ. դեկտեմբերի 20
Երևան



Գ. ԳԵՎՈՐԳՅԱՆ